

*Lein buc' esser trests
che nos concarstgauns ein morts;
lein esser engrazieivels
che nus havein giu els,
che nus havein aunc adina els.
Pertgei tgi che tuorna a casa tier il Segner
resta en la famiglia cristiana
ed ei mo ius ordavon a nus.*

Hieronimus (ca. 347-419)

Antonia Monn-Loretz, Rueras
19.01.1932 - 06.03.1998



Era sche nus savein che enzatgi ei malsauns e nus savein che la mort vegn a spluntar, sforza la vusch dil zenn, ch'annunzia la mort d'ina persuna ord nies miez, nus tier in paus. Ins seregor-da en in pign mument da silenzi dad ella e forsa sefatschenta in ni l'auter cun l'atgna sort.

Ils 6 da mars ei l'Antonia vegnida clamada ord questa veta terrestre. Dapi

entgin temps er'ella gia a Glion el spital, nua ch'ils ses han sperau agid en sia greva malsogna. Quietta sco ella ei vivida, aschi quietta eis ella morta. Possien quellas munglusas lingias schar reviver ella en nies miez e mantener ella en buna memoria.

L'Antonia ei naschida a Selva. El ravugl dalla famiglia da Sep Antoni Loretz e da sia dunna Constanzia naschida Berther eis ella carschida si ensemen cun 11 fargliuns. Da quei temps era Selva in vitg plein veta, in vitg da purs cun truscha e lavur che pretendeva da scadin commember d'ina famiglia da tschappar en e segidar. La scola da Selva sesanflava da quei temps a Sutcrestas. Cheu ha era nossa defuncta fatg ses emprems studis. Denton in onn eis ella stada a scola a Cavorgia. Ella era fumitgasa giu leu tier ina famiglia e plaschiu aschi bein ch'ella ei gest stada vinavon durent il temps da scola. Finidas las scolas primaras ha ella frequentau la scola da puras a Glion. Suenter quella eis ella stada biars onns en piazza en differents liugs, e quei entochen giu Turitg.

Enzacu retuorna ella a casa. Ensemen cun siu frar Giusep fa ella il pur enta Selva. Igl onn 1966 ils 27 da matg marida ella Stiafen Monn da Rueras ed els secasan giudem il vitg Rueras. In onn suenter ein els en treis, la famiglia

vegn benedida cun in feagl, igl Ervin. La truscha da famiglia e da puresser ha buca schau cupidar e procurau per lavur e quitaus; l'Antonia ei denton restada ina femna sempl, mudesta e da siu fatg. Igl onn 1975 han ei midau casa e serendi en casa paterna dal Stiafen; enta Suloms.

Ils davos onns er'ei vegniu aunc pli quiet enta Suloms. Ina nauscha malsogna ha mudergiau varga otg onns l'Antonia. Cun tgei pazienza ella ha supportau tut, sa mo tgi che ha giu contact cun ella duront quei liung temps. La malsogna ha spossau ella e beinsavens, udend il zenn da morts, ha ella giu il desideri ch'ella possi esser la proxima. Tgei dolur, tgei sentiments e tgei grevezia schaian en in da quels giavischs.

Ils 6 da mars ha Dieus dau suatientscha a siu giavisch e clamau ella tier el. Tut quei che schabegia e capeta en nossa veta ha in senn, igl ei denton grev d'anflar quel, da capir quel e da saver acceptar el. Era il cudisch dalla veta ha duas paginas; ina scrivin nus carstgauns cun nos giavischs, plans e speonzas, l'otra pagina scriva denton Diu, e quei che stat sin quella ei buca stau savens nossa finamira. Saver acceptar quei ed ira la veglia da Diu ei ina grazia.

Cara Tonia, ruaussa en pasch!

Bruno Berther